



## Bases para a instalación de postos os días 09, 10 e 11 de Maio de 2025 na Festa da Brincadeira de Bouzas.

### ÍNDICE

Bases de participación e instalación de postos de venda

**Anexo 1:** Convocatoria e preferencias de solicitude.

**Anexo 2:** Modelo de solicitude.

**Anexo 3:** Modelo de vestimenta.

**Anexo 4:** Modelo de posto.

#### 1. Obxeto

O obxecto das presentes bases particulares é a regulación da participación e instalación dos postos de venda ambulante no mercado ocasional que se celebra con motivo da Festa da Brincadeira de Bouzas, conforme a convocatoria anual que a tal fin publicará a Asociación Amigos da Historia de Bouzas.

#### 2. Postos de venda

**2.1.** Correspóndelle á organización a distribución dos postos, conforme co espazo dispoñible e coas súas características (tamaño, actividade, etc.) atendendo, na medida do posible, ás peticións das solicitudes. Ningunha empresa poderá optar a un posto que non se corresponda coa súa propia actividade comercial.

**2.2. O espazo será de 2 x 2 metros.** Enténdese como zona de venda o frontal do posto, non ningún dos laterais. Toda decoración ou actividade relacionada co posto (mobiliario, mesas, cadeiras, barra...), estará situado dentro do espazo adxudicado (**especial atención o apartado 3.4.**)

**2.2.1. Artesanía:** cada espazo dedicado á venda de artesanía, se a súa fronte ou o seu fondo non supera os 2 metros de, achegará 100 € (en concepto de colaboración coa festa para axuda de gastos de organización). por cada metro adicional ou fracción achegaran 10€. O aumento de dimensións do posto deberá ser solicitado no momento da inscrición e autorizado pola organización.

**2.2.2. Hostalaría:** cada espazo dedicado a hostalaría, achegarán cada un deles 300 € (250 € en concepto de colaboración coa festa para axuda de gastos de organización + 50 € en concepto de fianza). Se a súa lonxitude ou profundidade excedese desta medida, a achega a maiores será de 25 euros cada metro adicional ou fracción (máximo 3 x 3). O aumento de dimensións do posto deberá ser solicitado no momento da inscrición e autorizado pola organización.

**2.2.3. Postos de grandes dimensións:** serán considerados postos de grandes dimensións aqueles que superen os 4 metros de lonxitude ou os 3 de fondo. A achega de cada un deles será de 350 € en concepto de colaboración coa festa para axuda de gastos de organización, 100 € en concepto de fianza (para os primeiros 12 metros cadrados, e máximo de 20 metros cadrados), Se a súa lonxitude ou profundidade excedese desta medida, a achega a maiores será de 20 € por cada metro adicional. O aumento de dimensións do posto deberá ser solicitado no momento da inscrición e autorizado pola organización.

**2.2.4. Postos de dimensións especiais:** serán considerados postos de dimensións especiais, aqueles que superen os 20 metros cadrados. A achega de cada un deles será de 450 € en concepto de colaboración coa festa para axuda de gastos de organización, + 100 € en concepto de fianza (para os primeiros 20 metros cadrados), Se a súa lonxitude ou profundidade excedese desta medida, a achega a maiores será de 20€ por cada metro cuadrado. O aumento de dimensións do posto deberá ser solicitado no momento da inscrición e autorizado pola organización.

Tanto a noite do venres como a noite do sábado contaremos con vixilancia privada no entorno da festa, aínda así a organización non será responsable dos furtos.

Ademais contaremos con vixilancia privada polo día, para prevenir calquer altercado (pelexas, botellóns..)

**2.3.** A achega solicitada en concepto de fianza utilizarase única e exclusivamente para garantir o cumprimento das bases.

**2.4.** Os postos que comercialicen alimentos quentes susceptibles de verter calquera líquido aceitoso ou similar deberán protexer con material impermeable e resistente á calor toda a superficie ocupada polo posto cun ancho de 1,50 metros a maiores na fronte onde estea o mostrador de servizo ao público, segundo normativa municipal. Preferiblemente con material ignífugo de cor escura (moqueta industrial...). O rematar o evento a superficie terá que quedar limpa, sendo responsabilidade do posto. O non cumprimento terase en conta de cara a vindeiras edicións, usando a fianza para restituír o espazo, e aténdose a supervisión do Concello de Vigo, que poderá sancionar ata con mil euros dependendo do custe da reparación ou limpeza do pavimento.

**2.5.** Todos os postos contarán con recipientes destinados ao lixo, e farán a separación pertinente (envases, vidro e cartón). Ao remate da actividade deberán deixar todo limpo, tanto de posibles manchas como de calquera outro tipo de resto ou refugallo, e depositarán o lixo producido en bolsas ou sacos pechados nos colectores habilitados para tal fin por todo o recinto.

**2.6.** Os postos con alimentos confeccionarán unha listaxe de alérxenos, segundo lexislación vixente, que ubicarán nun sitio visible e á disposición da clientela, e tamén cunha listaxe de provedores para garantir a trazabilidade, con datos sobre data de adquisición, caducidade e composición para, en caso de intoxicación, identificar rapidamente a procedencia.

2.7. Todos os postos que se dediquen a alimentación ou que utilicen ferramentas terán que dispor dunha botica de primeiros auxilios, e todos os que utilicen lume (cociñas, carbón, etc.) deberán ter obrigatoriamente un extintor eficacia 21A-113B.

### 3. Condicións de participación (especial atención ao apartado 3.8 LUZ)

3.1. Todo posto terá que permanecer aberto durante o horario de celebración do evento. O peche ou non apertura que non sexa debidamente xustificado e autorizado dará lugar ás medidas disciplinarias que a organización considere oportunas, conforme coas bases establecidas.

3.2. As persoas que atendan os postos deberán ir vestidas conforme coa época na que está ambientada a festa en Vigo (para máis información consulten o Anexo 3).

3.3. No posto colocarse un cartel co nome comunicado na inscrición que será entregado pola organización no momento da validación do posto, e que será o do colectivo ou empresa que o solicite, co número asignado e os logotipos do Concello de Vigo e da Asociación Amigos da Historia de Bouzas. Ademais, a organización entregará un permiso, cos datos da persoa responsable e das características do posto, á disposición de inspección de traballo, sanidade, policía, etc.

3.4. Todos os postos deberán estar ambientados e adornados con elementos e materiais propios da época na que transcorre a festa (principios do século XIX, ano 1809). Terán que disimular todo o material moderno, plástico, metal, etc., que se empregue para a súa construción, e para tal fin empregarán materiais tradicionais como tea de saco, xesta, canizo, etc. Quedan prohibidas as carpas industriais e os toldos plásticos, así como cores fosforescentes, barras de cervexa e parasois.

3.5. Os postos que precisen facer lume para realizar as súas funcións deberán facelo constar na solicitude. Será obrigatorio para tal fin o uso de carbón vexetal e ter as grellas correctamente illadas. Non se poderá facer lume debaixo de toldos, instalacións eléctricas, etc. Os equipos de gas contarán con conxunto regulador para gas con “casquillo”, manguera e bombona homologadas. **Quedan prohibidas as cociñas estilo “Camping Gas”. Só Terán autorización para facer lume o postos de dimensións especiais.**

3.6. Non se permitirá publicidade (pancartas, carteis, bandeiras, etc.) que non teña relación coa festa.

3.7. Todos os carteis, prezos e rótulos estarán redactados en galego cunha tipografía acorde coa época na que está ambientada a festa (ano 1809). A listaxe de prezos deberá estar á vista e non se poderá alterar durante os días da mesma. A música e a animación deben ter unha temática axeitada á época e calquera alteración deste espírito será motivo de apertura de expediente de sanción ao posto. **Queda prohibida a instalación de aparellos reprodutores de música.**

3.8. **A organización proporcionará unha toma de corrente.** A hostalaría contará cun máximo de 500W por posto e achegará unha cantía de (pendente de prezo). A artesanía non contará con punto de luz. Os postos especiais contarán cun máximo de 1000W e achegará unha cantía de (pendente de prezo).



Non se permitirá a instalación de xeradores eléctricos de corrente ou grupo electrógeno que funcionen con combustibles líquidos, soamente acumuladores de enerxía. No caso de autorizar algún elemento deberá cumprir os requisitos establecidos\* en ITC BT 40; ITC BT 04.

**3.9.** Montaxe do mercado, o xoves 08 de maio entre as 20:00 h e as 23:00 h, **so hostalaría** (Sempre que non interfira na vida diaria do barrio), o venres 09 de maio dende as 9:00 h ata ás 15:00, **so artesanía**.

**3.10.** Apertura do mercado:

- **Venres 09 de maio de 19:00 h a 23:00 h.**
- **Sábado 10 de maio de 11:30 h a 23:00 h.**
- **Domingo 11 de maio de 11:30 h a 21:30 h.**

A persoa representante do posto terá que asinar a folla de rexistro facilitada polo representante da organización na que se validarán as condicións de apertura do posto (hora efectiva de apertura, vestiario, adecuación, protección dos produtos do chan, etc.). A non sinatura da folla de rexistro significará a retirada inmediata do posto.

**3.11.** Representación: A representación da historia da Brincadeira será o sábado 10 de maio ás 18:30 h, ubicado na explanada da igrexa de Bouzas (Praia do Adro).

II Concurso de traxes da época, o domingo 11 de maio ás 13:00 h, ubicado no torreiro da explanada da igrexa de Bouzas (Praia do Adro).

**3.12.** Os vehículos deberán ser retirados do recinto antes das 15:00 horas o venres 09/05, e ás 09:30 h o sábado 10 e domingo 11, e non poderán volver a entrar nel ata o peche do mercado, ambos os días, se as circunstancias de afluencia de xente así o aconsellaran por problemas de seguridade vial.

#### **4. Seguridade e hixiene**

**4.1.** As comidas e bebidas serviranse en envases de barro, louza (xerras, cuncas...) ou madeira. Prohíbese expresamente a utilización de materiais plásticos ou metálicos (latas) para tal fin, incluídos pratos, garfos, culleres, etc., e prohíbese tamén a venda de botellas de vidro para consumo inmediato, nin sequera se estes materiais están disimulados.

**4.2.** Por cuestións de hixiene, prohíbese a re-utilización de vasos, cuncas, xerras, etc., estes serán dun só uso ou de venda á clientela.

**4.3.** Todas as caixas (sacos, bolsas...) que conteñan alimentos estarán illados do chan.

**4.4.** Por prevención de contaminación cruzada, a superficie do posto estará limpa e ordenada.

**4.5.** É obrigatorio o cumprimento do Real decreto 3484/2000, do 29 de decembro, polo que se establecen as normas de hixiene para a elaboración, distribución e comercio das comidas preparadas (sempre por persoas con carné de manipulador de alimentos). Os alimentos non poderán estar ao alcance directo do público, tendo que estar separados ou protexidos.

**4.6.** Está prohibido verter residuos sólidos ou líquidos a rede xeral de pluviais nin a de saneamento.

## **5. Disposicións finais**

**5.1.** As persoas responsables dos postos terán que acudir obrigatoriamente á reunión de seguridade que terá lugar **o 29 de Abril, ás 20:00 (hostalaría), e 30 de Abril, ás 20:00 (artesanía)** na quenda que lle adxudiquen, e na ubicación que indique a organización. Na que farase a implantación do plan de auto-protección, no cal trataranse os riscos propios da actividade do mercado tradicional, as medidas preventivas a aplicar, e a resposta ás posibles situacións de emerxencia dun xeito coordinado entre os postos, a organización e os medios de auto-protección humanos e técnicos, dispostos para o evento.

**5.2.** Todo posto terá que ser retirado antes de abandonar o recinto da festa o domingo 11 de maio.

**5.3.** Queda terminantemente prohibida a venda de alcol a menores de idade. Será responsabilidade única e exclusiva do solicitante do posto cumprir esta condición.

**5.4.** A organización non se responsabilizará do posible deterioro, furto ou perda de material ou mercadoría, polo que recomenda a súa retirada durante a noite.

**5.5.** A organización declina no posto vendedor toda responsabilidade sobre a calidade, composición, manipulación, elaboración ou prezo dos produtos por el expostos ou vendidos, así como das condicións laborais das persoas que participen nel, que terán que cumprir a lexislación laboral vixente segundo corresponda. Ademais, o persoal dos postos de alimentación deberá de contar co carné de manipulador de alimentos.